

“Službene novine Kantona Sarajevo”, broj 13/03

Na osnovu člana 55. Zakona o upravi u Federaciji Bosne i Hercegovine ("Službene novine Federacije BiH", br. 28/97 i 26/02) i člana 26. stav 1. Zakona o Vladi Kantona Sarajevo ("Službene novine Kantona Sarajevo", br. 7/96, 10/96, 20/98 i 4/01), Vlada Kantona Sarajevo, na 18. sjednici od 5. juna 2003. godine, donijela je

UREDBU O OSNIVANJU PRESS SLUŽBE KANTONA SARAJEVO

Član 1.

Ovom uredbom osniva se Press služba Kantona Sarajevo (u daljem tekstu: Press služba), utvrđuje njen djelokrug, način rukovođenja Press službom, kao i druga pitanja od značaja za organizovanje i funkcionisanje Press službe.

Član 2.

Press služba vrši stručne poslove iz oblasti informisanja za potrebe Skupštine Kantona Sarajevo, predsjedavajućeg i zamjenike predsjedavajućeg Skupštine Kantona Sarajevo, Vladu Kantona Sarajevo, premijera Kantona Sarajevo, ministara i drugih rukovodilaca kantonalnih organa, koji se odnose na:

- ostvarivanje stalne saradnje sa redakcijama dnevne i druge štampe, radija i televizije;
- organizovanje i vođenje konferencija za štampu;
- pripremanje informacija i saopćenja za javnost;
- izdavanje Biltena Kantona Sarajevo;
- pripremanje foto, filmske i druge dokumentacije kojom se predstavlja Kanton Sarajevo u zemlji i inostranstvu;
- arhiviranje štampe, prikupljanje, kompjutersku obradu i pohranjivanje podataka neophodnih za izradu informativnih materijala za potrebe domaćih i inostranih novinara;
- druge poslove iz oblasti informisanja.

Član 3.

Radom Press službe rukovodi šef, koji u pogledu rukovođenja Press službom ima prava i dužnosti rukovodioca kantonalnog organa uprave.

Šefa Press službe postavlja i razrješava Vlada Kantona Sarajevo, na prijedlog premijera Kantona Sarajevo.

Mandat šefa Press službe traje koliko i mandat Vlade Kantona Sarajevo, a nakon isteka mandata može biti ponovo postavljen.

U slučaju spriječenosti ili odsutnosti šefa Press službe, u poslovima rukovođenja Press službom zamjenjuje ga službenik kojeg on odredi.

Član 4.

Unutrašnja organizacija Press službe utvrđuje se pravilnikom o unutrašnjoj organizaciji.

Član 5.

Press služba ima svojstvo pravnog lica.

Sredstva za rad Press službe utvrđuju se u budžetu Kantona Sarajevo.

Član 6.

Press služba počinje s radom danom postavljenja šefa Press službe.
Pravilnik o unutrašnjoj organizaciji Press službe donijet će se u roku od 15 dana od dana postavljenja šefa Press službe.

Član 7.

Stupanjem na snagu ove uredbe prestaje da važi Odluka o osnivanju Press službe Kantona Sarajevo ("Službene novine Kantona Sarajevo", br. 1/99 i 31/01).

Član 8.

Press služba, osnovana ovom uredbom, preuzima arhivu i dokumentaciju Press službe koja prestaje s radom na osnovu ove uredbe, kao i službenike i namještenike te službe, u skladu sa zakonom kojim se regulišu radni odnosi u upravi.

Član 9.

Ova uredba stupa na snagu danom objavljivanja u "Službenim novinama Kantona Sarajevo".